


奉天通志

第一箇六冊
大事明四至六

卷一百一十五

六

大事



奉天通志卷十四

大事十四 明

明四 景帝 英宗

景帝景泰元年春正月命遼東兵住永平聽調

明實錄正月庚寅命都督焦禮施聚等統領遼東官軍暫住永平城操練聽調

遣遼東兵還鎮

明實錄正月庚子少保兼兵部尚書于謙奏有軍人王貴自虜中還言阿剌知院人馬往遼東搶掠令都督焦禮施聚領軍還遼東乞勅沿途謹慎隄備務須首尾聯屬互相接應不許自分彼此因而誤事從之

閏月進遼東守備焦禮施聚為左右副總兵

明實錄閏正月丁未勅諭遼東寧遠守備右都督焦禮義州守備右都督施聚今特命爾禮充左副總兵爾聚充右副總兵各在本處守備遇警領軍協同總兵官左都督曹義等殺賊爾須運謀奮勇同心竭力以成其功毋或自分彼此有誤事機如違取罪非輕

命登州歲運粟餉廣寧軍

明實錄閏正月辛酉命山東登州衛歲運糧一萬石赴遼東廣寧城餉軍

蠲減遼東屯糧

明實錄閏正月壬戌提督遼東軍務左都御史王翱奏廣寧等

衛屯軍去秋有被虜選守城者其該徵子粒乞全蠲免其尚留屯田者亦被胡騎踐踏乞蠲其半從之

二月遼東鎮守太監易信奏請改造手把銃許之

明實錄二月壬辰鎮守遼東太監易信言軍中手把銃輒不繼賊已習知每乘隙進兵自今手把銃須柄長七尺上施槍頭銃盡用槍庶不摧挫因以木為式上聞詔兵仗局造之

按易信即亦失哈之

易名遼陽崔將軍墓志宣德元年同太監亦信下奴兒干等處是也

三月謫棗強縣知縣張純於遼東

明實錄三月乙巳直隸棗強縣知縣張純坐事為民以銀百兩賂奉御舒良求平反良不從純懷出北安門為官軍所詰送都察院鞠之引伏詔充遼東邊衛軍

召募納米於遼東

明實錄三月辛未命戶部出榜召募各處軍民客商人等納米以備各處軍餉賑濟飢民其不用兵處遼東四百石俱給冠帶以榮終身半其數者賜勅旌為義民從十三道監察御史畢鸞等奏請也

夏五月免遼東災糧

明實錄命瀋陽等衛今年夏稅減免十分之七秋糧子粒減免十分之四俱存附近備用以歲旱薄收從巡撫右都御史朱鑑奏請也

建州人犯遼東詔朝鮮出兵截擊

明實錄五月癸丑敕朝鮮國王李珣曰近得鎮守遼東總兵等

官奏報開原瀋陽等處達賊入境搶掠人畜及攻圍撫順千戶所城池審知各賊乃建州海西野人女直頭目李滿住凡察董山刺塔為北虜迫脅領一萬五千餘人來寇守備官軍追逐出境又稱欲增人馬再來攻劫已遣敕遼東總兵等官整搦軍馬固守城池設法擒剿朕詳李滿住等素與王國有仇至今懷恨不已恐其乘機前往王國地方哄嚇為寇不可不豫為之備敕至王宜戒飭邊將嚴整軍馬謹慎烽堠設法防備倘遇前賊出沒潛遁即便截殺以除邊患

朝鮮文宗實錄四月癸巳時韃靼脫脫王屯兵廣寧遼東近地也先屯大同城外李滿住等諸種野人皆投于彼聲言將擊遼東以及我國金宗瑞在平安請修州郡城堡以備要害政府沮

之至是復上書言之

明史朝鮮列傳會遼東奏報開原鐵嶺有寇入境掠人畜係建州海西野人女真頭目李滿住等為嚮導因與珣相為犄角截殺之

召鎮守遼東太監易信還京

明實錄五月戊午召鎮守遼東太監易信還京時建州衛都督李滿住潛通胡虜都督刺塔散兵剽掠少保兼兵部尚書于謙以信其親黨恐泄事機請密為區處故有是命

復遼東軍羅綺為大理寺右寺丞

明實錄五月戊辰召前大理寺右寺丞羅綺至命復原職綺正統間坐事謫戍遼東尚書金濂薦其才可用故有是命

六月提督遼東軍務王翱請分兵三路討建州

明實錄六月癸未提督遼東軍務左都御史王翱奏海西建州李滿住刺塔等累入境肆掠臣等議調官軍分三路先擒剿滿住凡察董山三寨然後發兵問罪海西敕翱量度事機如其可圖分兵攻剿否則慎勿輕舉

七月也先聲稱奉上皇回京詔遼東沿邊諸將備邊

明實錄七月癸亥敕遼東沿邊總兵等官曰今得兀剌公幹回還右侍郎李實說稱也先要於八月內遣人馬奉上皇回京師朕念此賊譎詐非一日矣爾等務須晝夜為備不可墮其計如違誤事取罪非輕爾等其慎重之

八月寇入遼東總兵官曹義追敗之於連州

明實錄八月戊寅虜入遼東境總兵官左都督曹義都指揮王祥耿和等率軍追至連州賊千餘人分三處各占山頭以拒官軍義等奮勇齊進斬首七級生擒四人獲馬十三匹遂奔散出境遺棄所虜男婦一千七百五十餘名頭畜稱是參將胡源亦率軍追賊至鷹湖連戰敗之追奪所掠男婦十九名

十一月進王祥為都督僉事仍掌遼東都司事

明實錄十一月甲辰陞遼東都指揮使王祥為左軍都督僉事仍掌都司事以擒敗達賊功也

全遼志四累陞都督僉事仍掌都司事

遼東志五累功陞都督僉事統領遼陽人馬

進李純從二品俸

明實錄十一月乙丑陞鎮守遼東左副都御史李純從二品俸以其有殺賊功也

二年春正月遣石忠至遼東候見脫脫不花

明實錄正月丙午敕提督遼東軍務左都御史王翱鎮守太監宋文毅曰得爾等奏報脫脫不花王親領人馬收捕野人女真欲到開原空城已敕永平山海總兵官選調精銳官軍五千人委參將一員管領在開原操候又令在京選調官軍三千操備聽候策應永平山海爾等遇賊來到先飛報永平等處仍自相機剿殺不許似前賊已臨門猶自不信退縮畏懼坐失事機如違必重罪不宥今命都指揮石忠來遼東伺候脫脫不花王來近爾處爾等即量遣人伴送石忠往與相見而歸毋或違誤

給遼東軍馬

明實錄正月壬戌給遼東官軍馬二千匹

二月修永寧監城堡

明實錄二月庚辰修遼東永寧監城堡

提督遼東軍務王翱復請討建州許之

明實錄二月丁亥敕遼東提督軍務左都御史王翱並鎮守總兵參將等官曰得爾等奏建州三衛賊首李滿住等姦詐百端方送還人口又縱賊虜掠爾等欲選摘精銳馬步官軍往近邊駐劄省諭滿住等將所虜人口盡數送回軍前報罪如或展轉延調就便相機征剿今悉准奏敕至爾等務在籌議停當計出萬全不可輕易忽略有誤事機

築雪裏站堡城

明實錄二月戊子提督遼東軍務左都御史王翱奏欲以連山把截官口左右并迤東第四站雪裏去處築置城堡撥軍守把防送使臣保障軍餘屯種從之

逮遼東鎮守內官陳海

皇明大政記補遺二年二月捕遼東鎮守內官陳海以鐵劍與夷人哈丹易馬被劾又有司禮監高顯情強奪人房屋仍飾奏法司禁錮

夏四月朝鮮防建州李滿住童倉等侵入

朝鮮文宗實錄四月丁亥諭平安左右道節制使曰今久旱慮鴨綠江水淺賊人易涉況今忽刺溫遺種及李滿住童倉輩來

接婆猪地面密邇我疆變在朝夕甚可畏也勿謂邊警稍息常如見敵毋或小弛諭咸吉道都節制使曰忽刺溫李滿住童倉等移接婆猪及脫脫兵馬來屯豆門地面真偽林哈刺發程至接處宜遣親信野人不煩聞見連續啓達

又八月辛未議政府啟今被擄逃來唐人唐貴張順等供稱吾等去年八九月間為李滿住凡察等管下人所擄今年六月乘夜逃出晝行夜歇五日至理山地面滿住曾居渾河今年三月畏達達及遼東軍馬率部下移居渾河迤南十日程枉天地面自枉天以南二日程地名吾未何吾未何以南半日程地名婆猪江自婆猪江至枉天道路不險其間雖有川河人馬皆可通行吾未何西邊有兀刺山城滿住管下人等常言右山城險阻

西不畏遼東北不畏達達唯南邊朝鮮軍馬甚可畏然避亂之地莫如此處今年秋收後當來居于此以是觀之上項滿住等移居處與本國後門不甚相遠且賊路平易滿住等不忘舊覺乘虛突入作賊可慮

五月進佟火你為建州右衛都指揮使

明實錄五月戊戌陞建州右衛都指揮僉事佟火你為都指揮使指揮同知李吾哈為都指揮僉事賜綵幣有差先是提督遼東軍務左都御史王翱等奉命遣人往建州諭李滿住等俾送還原虜人口至則滿住等先已避脫脫不花王兵遠遁獨佟火你等在引使人深入獲見滿住送還人口三百二十人佟火你又備方物入貢翱等言其効勞可嘉乞增秩獎勵故有是命

脫脫不花王遣歸遼東總旗高能等

明實錄五月己酉遼東三萬衛所鎮撫總旗舍人高能等七人先是齎敕往海西等衛招撫遇脫脫不花王部下虜以去至是遣使送回

朝鮮文宗實錄八月甲戌下諭書于平安道右道都節制使曰今來左道都節制使啟本節該李滿住管下金納魯等六名到江界地面滿浦問其來由則曰脫脫兵馬擊海西衛殺虜人物因此滿住不得寧居今年三月還居兀剌山城貧村凡察子甫下吐則移居貧村迤北十五里吾毛水之地充尚則移居貧村上項滿住管下一千七百餘戶充尚甫下吐管下共六百餘戶自桑木仇非至于沈者羅老林加羅古家基址則海西衛指揮